

劉琳 李勇先 王蓉貴 校點

黃庭堅全集

(四)

四川大學出版社

責任編輯：莊 劍
責任校對：魏 銀 李小平
封面設計：羅曉紅
責任印制：吳雨時

圖書在版編目(CIP)數據

黃庭堅全集/(宋)黃庭堅著. —成都:四川大學出版社, 2001.4

ISBN 7-5614-2105-2

I. 黃... II. 黃... III. ①黃庭堅(1045~1105)
—全集②文學—作品綜合集—中國—北宋
IV. I 214.412

中國版本圖書館 CIP 數據核字(2001)第 22342 號

書名 黃庭堅全集

作 者 劉 琳 李勇先 王蓉貴 校點
出 版 四川大學出版社
地 址 成都一環路南一段 24 號(610065)
印 刷 四川五洲彩印有限責任公司
開 本 850mm × 1168mm 1/32
印 張 99.375
字 數 2190 千字
版 次 2001 年 5 月第 1 版
印 次 2001 年 5 月第 1 次印刷
印 數 0001 ~ 1100 冊
書 號 ISBN 7-5614-2105-2
定 價 (全書四冊)360.00 圓

版權所有◆侵權必究

宋黃文節公全集·續集卷第四

戎州

與東川提舉先狀

伏審提舉太博肅驅使節，來按屬城，凡在指揮，以喜以懼。某永投魑魅，猶托光輝。伏惟久患腳氣，拜起艱難，不獲躬詣前道祇候參迎，下情無任皇恐之至，謹具狀申聞。謹狀。

與東川提舉手書

啓。季冬極寒，伏惟提舉太博尊體動止萬福。即日某蒙恩，衰疾所嬰，不能衣冠，無階參觀，下情無任望風瞻仰之切。謹奉狀起居，不宣。謹啓。

與戎州新守先狀

右，某伏審知郡崇儀肅驅使節，將次郊圻，凡在部封，孰不欣慶？某棄投魑魅，猶托光輝，下情無任喜懼之至，謹具狀申聞。謹狀。

答瀘帥王補之

損酒、醋、蜀紙、眞珠粉、乳餅，皆領。每以口腹所須累長者，感愧無已。西州紙乃有極佳者，近方托人置得二千許，然不知其孔穴，亦難置耳。唯魚牋、厚經屑、冷金、浣花、大小屏風爲佳品，比常市者其價略倍也。酒、醋極爲用。此州公廚酒大概常薄，甚則酸澀，民間時有可飲者，不免少村氣耳。乳餅亦佳，此富順、眉州易得，但多入米易酸。眞珠粉自是食中有風味者。某所作荔枝湯，擘生荔枝肉，別貯其自然汁，以水解白沙蜜，漸入和合，令味相得，即并荔枝肉上火煮，減半，以瓷合貯之。計客數，人一勺。又令入湯小半盞，煎沸，用紗囊盛龍腦，先撲熱盞，乃注湯。餘甘湯：餘甘用一種大如李，皮皺肉黃赤者，沙盆中微擦去皮，乃以摩薑汁鉢細摩，人用水半盞，四人用炙甘草一寸同煎。久之，亦用龍腦囊撲熱盞，乃注湯，大率人不過餘甘一枚。眞珠菜淨

濯去腥氣（二），入葱白數寸，椎薑一塊，椒數粒，沸湯綽過，研五味薑醋，食之甚佳。櫻花剝去皮及莖幹，取成塊者湯中煮，令熟，煉蠶油炒令香，下葱、薑、椒、醋，水相半，煮沸，微加鹽醬，甚美。比治二種菜，食之殊佳，謾錄上。

（二）「眞珠菜」以下，《山谷簡尺》卷上另作一篇，當是。

又

拙字不足觀，辱過情之譽，增愧。令姪紙卷輒寫去，一笑耳。此所居寺甚陋，比於舍後作槁木寮、死灰庵，前後相當，差明邃。日與嘉州在純上座及唐道人同齋粥。向所苦心痛不作來六十餘日，覺飲食復似黔中時，但腳氣不除，時有頭眩，膝下痛。但妨讀書及拜起耳，於參道日向百不會者，不爲大患也。蒙眷憐之厚，故具之。

又

頃承損惠五米、六酒、四醯，舍弟經過，又煩濡沫。公養孤恤貧，推惠甚博，不肖每累公憂其

簞瓢，慄仄慄仄。到戎一年，雖未有生資，然萬事隨緣，少欲易足，家人亦能忘貧耳。蒙左右眷憐之厚，故及之。

又

再拜啓〔二〕。得雨，秋氣明爽，伏惟燕處萬福。見所賜家弟去月晦日書〔三〕，悉得日用輕安，處進退之際〔三〕，意慮歡然〔四〕，惟有欽歎。承治行日就緒，何慰如之！雖瞻候未卜，而數聞君子之音，欣慰無斁，謹奉手狀承動靜。謹狀〔五〕。八月初四日，庭堅狀上補之安撫明使君老兄閣下。

家弟蒙賜手筆甚勤重，欽仰盛德，何日不懃。繼當作記，奉承動靜。庭堅再拜。

〔一〕啓：原作「亟」，據《山谷簡尺》卷上改。

〔二〕去月：原無，據右書補。

〔三〕「進退」，右書作「炎涼」。

〔四〕歡：右書作「淡」。

〔五〕「謹狀」以下原無，據右書補。

答王雲子飛

頓首。前日遣諸兵還，寓書當已徹齋几。即日暑氣益侵，不審何如？伏惟侍奉熙慶，退食敏脩，日用安吉；子均、子與相從講學，有日新之功。子茂所領甚冗，亦得暇時來近文字否？但恐樽酒謔浪，費日多耳。某比無他，得舍弟到眼前，甚慰。兒輩亦隨緣令讀書，不欲迫迕之，平生自不得此物秋毫力耳。自此欲屏筆研，開藏經。或未數書，千萬珍重。謹勒手狀。

又

頓首。不敢率易作尊公書，因寢門問膳，爲道小人區區。舍弟到家亦多病，未能作狀也。閬中進士鮮澄自源自閬中來相過，留此兩月許。其人知書，有以自守，某之友王蕃觀復今爲閬州節推，亦稱其家居擇友，不妄與人游也。遠來困於旅瑣，欲謁薪水之資於瀘州，不知士中有哀王孫者乎？

又

再拜。雨後民氣稍蘇，物價亦小平，頗以爲慰。伏想即日侍奉萬福，治行當已就緒。比因成瑣江人奉伯仲書，必已徹几下耳。盛天錫諸孤已向趙市否？累日欲作書承安撫公動靜，陰晴不常，夜中取冷太過，晝則憤憤，似此竟未就。至於懷仰之思，與迹殊不類也，度必蒙見察耳。匆匆復通萬一。

又

再拜言。君子不幸，先公安撫使君奄棄明代，聞間驚怛，不能處情。地陷天崩，永失依怙，攀號不逮，肺肝摧絕，荼毒痛楚，何可堪任，奈何奈何！日月不居，亟更弦望，追慕無翼，觸事隕心，罔極奈何，孝思奈何！某抱罪裔土，身不得前，無緣扶服奉慰，謹奉疏悲塞。

又

承欲寓居襄鄧間，漸謀生事，似未安也。以不肖所商，不若且止荆南，荆南士大夫家頗有知義

者，以歲月買田築屋，使幹者以舟上峽，稍稍化居時物，似爲有理。至都下雖有二十二驛，其實半月從容可到。聞幹故未集，尙須久留舊治所。前已託劉奉職道鄙意，餘朝夕更奉書也。居喪哀爲主，而濟之以忠厚則無悔，摧毀太甚，亦不可以獨爲君子，千萬以理制情。

又

尊翁團練盛暑，伏惟起居萬福。因問寢，幸達區區。承齋寢損膳，以憂不雨，惟至誠感動天澤，必已霽然耳。盛推官逆旅之間，禍故如此，使人駭歎悲塞，不能爲心，非賴盛德之庇且覆溺，不可知矣。二女長成，若且了得此二事，其餘皆易措手。揮汗臨筆硯，書畫不如禮，故不敢上狀，伏幸裁察。

又

庭堅竊聞尊公團練忽被旨罷瀘州，計須待監司交割，乃得解印。亦聞僦民舍遷止，甚善。然盛暑又江漲，水陸皆不便，不審即日治行之策何如？幸垂諭。所寄紙軸及尊翁所要《蘭亭》詩，子予紙軸，皆寫畢，不欲付此獠卒。初二日密上座決行，並託調護去，並作書承尊公動靜，及附子均書

也。

與甥王霖子均

頓首。天錫沂流，凡得三書，今猶在成都，所將物已有所付，但事未集耳。往書軸出於草草，不足觀傳後，他日有佳紙，當爲作小行書數幅也。適作書多，臂中欲作隱痛，書不能一。

又

人來，不得書。承小失調護，良耿耿。想瀘南得雨後差涼，所苦亦已平。表姊太君萬福。天錫家禍如此，閑處思之，猶不可堪，何況親當之者！承已權窆，必如法，然聞其家大小尙未寧，夫人又欲便歸，聞之惻然。不知十九娘之婿遂能如期來否？宋三十七亦解事，更丁寧之，當此艱勤，亦是人種陰功時也。府公非次罷歸，賢不肖誰不嗟惜，然此豈人事哉！此公老於世故，存心忠厚，有器度，必非久困者。今西方須人材，未必不因此出旋渦耳，但恨不得一往見。盛暑既不可登陸，水行又防江漲，計須少從容爲萬全之計，及行尙可三四奉書也。秋暑能病，千萬爲親自重。某頓首。

又

承體中多不快，亦是血氣未定，時失調護耳，少年人例多如此。某二十四五時，正如此病，因服兔絲，遂健啖耐勞。今寄方去，蜀中難得細粒兔絲，至荆南便可得也。

兔絲子淘擇淨，焙乾，稱九兩，準一勝。用好法酒，不用煮，酒一升，浸三日許，日中曬，時時翻，令漚盡酒，薄攤曬乾，瓷器貯之。每日空心抄一匙，溫酒吞下，久服不令人上壅。服三兩月，其啖物則如湯沃雪，半歲則大肥息矣。覺氣壅，則少少服麻仁丸可也。往歲常傳此法與京西李大夫，其人服不輟，昨任祕書少監，與同省，啖物作勞如少年人也，已七十四五矣。

又

兩辱書，承表姊太君存問誨諭，恩意千萬，開慰無量。安撫公慈祥孝友，忽然失之，舉家皇皇，於今未寧。子飛氣弱，昨日又經大病，恐摧毀太甚，須垂意調護之也。子予，父之愛子，想哀毀亦不自勝，惟以禮節之耳。趙市骨肉，想時得書，暫寓亦安穩不？襄鄧謀居，既舍舟出陸，糜費

已多，又素無根基，恐未便得成就。以老夫計之，不若且止荆南，偕弟宅暫居，稍置田園。物賤，又有通水之便，入都盡坦途，轉江又易爲力，更從長相度。頃病眼半月許，方得少愈。鄉僕煎迫求歸，適有便舟，連日寫書，眼復痛，腕幾欲脫，作書極草草。

又

辱書。審雪寒侍奉萬福，爲慰。知子飛兄弟居喪，盡哀應禮，甚副此想望之意。但不知成都幹事使臣〔二〕，能不於存亡之際有所負否？萬一不如人意，乃門戶災蹇時，物理當爾，亦不足計較也。以今之勢，且百事隨緣省約，并力於荆南之田，爲三年伏臘之計，有餘亦可小作巴峽往來化居之策。人生爲善，天不終困人耳。無緣會面，千萬自重。

〔二〕使：原作「吏」，據《山谷老人刀筆》改。

又

霜寒，即日想侍奉安常。表姊太君當此百憂，眠食健否？《檀弓》卷子方寫得數行，日爲索客

踵門，粥食亦失時，殊可厭倦。寫得，續求便并《金剛經》往矣。留使臣二日待文字，竟寫不就，甚愧。草草上報，餘須後信也。

又

子均仁甥：累辱書，審侍奉表姊太君寧固，甚慰馳情。安撫公即世，忽復見春，永懷仁心義烈，未嘗不爲揜涕也。況少孤遠歸，方得所託，而遽失嘉木之蔭，悲痛何勝邪！扶護遠歸，子飛、子予煢然在疚，內外事子均不可不悉心盡力也。急發此書，不能具所欲言，三兩日間遣曹安回，當具之。

與人

昨夕飲酒不多，何以遂憊？恐猶未起，故不敢奉謁。少間能來對棋否？偶得小詩，謾遣至，或可解醒耳。

又

夜來飲酒不多，何故遂憊如此？欲煩公作炒桑蛾輩、冷淘漿水飯主人，可乎？早了縣事，令眼前淨，後共飯乃佳耳。

答王觀復

頓首。遠承遣介惠書，勤懇勤懇，三復增歎。足下強學博聞，日新而不已。小人負罪，不得齒縉紳之末，豈敢如所推獎？且求博約琢磨之意，但愧慙自汗耳。又每所稱道，輒以不肖列於先達數公之間，此尤不敢當，亦使足下品藻之論不信於時人也。某避嫌易地，尙蒙恩貸。戎州雖地熱，春冬時作瘴癘，不如黔州地寒有雪霜，風土宜人，然米麥衣着差易得如黔州，士大夫亦有可與游者。一裘一葛，蔬飯易足，但爲自東更移稍西，儼船泝流，在道幾三月，不能不費耳。過承致念，故具之。先公詩卷又得熟讀，高明溫潤，有作者之風，惜乎不得少發其蘊見於世也。輒以鄙句附驥尾，或因此詩而傳後耳。見和東坡《七夕》長短句，及「可惜騎鯨人去」之語，既嘉足下好賢，又深歎古來文章之士未嘗不爾也。草草和成二章，言無可采，當面一笑耳。鄙文一編，所得何其多邪？其

中亦多少時文字，氣嫩語艱，不足存者。此所無者，謾抄下以與門生兒姪輩；彼所無者，亦有三分之一，匆匆未果錄去，他日可寄也。但有樂府長短句數篇，謾往。遠寄縹緇紫紗，戎州地熱，即用作暑服，荷簪卹之賜也。乍到，未有佳物可以爲報，家園雙井來，乃分上。聞足下飲食宴樂，出入車馬，無不在於學，如此古人乃不難到。更願加求己之功，沈潛於經術，自印所得。根源深遠，則波瀾枝葉無遺恨矣。李長倩骨氣清秀，但讀書泛濫，未能得其要，得足下切磋，當有日新之功。同僚中復得佳士否？所差人不縣歷，北轅之楚，失路而曉，幸門生胡斯立者見而憐之，爲僦一閭人送來。留此雖多日，日與三升米。今問得自富順入資，遂，由果至閬十五驛，徒行不重載，十日可到。二人供給米三斗，錢一千，計不至餒於道矣。異日或遣行，可并其乳媼來也。欽想好學之風，無階面會，臨書增懷，千萬強學自重。九月八日。

答李長倩

頓首。自發黔中，遂不聞左右動靜。忽得來教，承攝局在閬中，去親庭不遠，旦夕問安，雖從吏事，不廢詩書，驩喜無量。王觀復佳士，想相從甚樂。興元闕在何時？板輿肯同行就養否？知命在涪陵逾歲，舟行日又留舍弟官所，約九月來歸，猶未得近音。兒姪輩皆在此，隨緣可過，不資人力也。今寓舍在南寺，乃當閬闌中，屋室差勝開元舊居，但無復摩圍江山之勝。此亦有東禪，在近

城，風物瀟灑，但須整葺。又主人爲治南寺已成功，因不欲謀遷東禪也。有純上座、唐履道人於此同齋粥，忽忘日月之逝也。相比得一少年與之共學，已略就緒，相亦讀書不費。橄，知命去年九月在涪陵生此男，小字牛兒，風貌極魁岸可喜，學語學行，意氣已勝相，殊慰眼前。伏臘隨所有爲廣狹之度，不求於人，亦林下之樂也。別後故人惟楊明叔學問、文章、書札皆勝進，彭水行亦歲滿，云當求此方差遣，欲竟其學，殊未可量也。比時苦心痛，又眼有黑花，以故作書不倫，不成字，幸裁察。相望數百里，臨書耿耿，千萬自愛。九月八日，某頓首。

答宋子茂殿直

都下兄弟想常得安問。木龍巖四旁稍引水吠，令平坦處雨過即乾，亦佳耳。子飛所須字，凡寄三跋尾往矣。荔枝菴聞結構不甚如法，若其中令用白泥作小月床，置四瓦墩菴後，更搬去客土，作七間許小茆屋繞之，作茶藥寮之類，亦便可宴安矣。白院主好修造，而務要出己，用驢打毬法使之，無不盡力也。楊道者極聽人語，略有智識，他日參禪學道，必有立者。欲有所改作，更呼楊問之。昨見寺中合得辟瘴散，味甚好，試爲取其方寄示。若有北來棗，求百十枚。欲寄茶芽去，適此人煎迫，書不暇，但寄得府公茶耳。

又

頓首。辱書勤懇，審比來日用輕安爲慰。家弟經過，煩主禮篤密，感刻感刻！惠墨甚副所乏，榮紙謾及之。臂痛初不知其因，姑用蒼梧膏及花乳石散，皆不效，服烏犀丹、透水丹乃小愈。意其老態百出，平生未嘗病風，忽亦作爾。然飲食不驟進，四支不甚腫脹，亦是從來無風根耳。今則十愈九矣，但粥食後輒思睡，百事慵懶，意往而力不隨耳。老於閑地，此疾不害事也。子飛昆仲想相從勉讀書，殊勝閑談弄酒盞也。未緣會集，臨書懷想，千萬珍重。

與試官李正孺

再拜。待罪魑魅之域，衰疾無所堪任，幅巾直數，不可以謁長者之門。雖聞車馬到城，不能一參候，乃蒙辱顧訪不倦，無宜得此，但愧畏耳。晚來暑氣不解，不審飲膳何如？承來旦遂成行，願道途珍重。謹勒手狀。